

西宁府续志·卷一 地理志



沿 革

西宁县 碾伯县 大通县 贵德厅 巴燕戎格厅 以上均详前志
新隶循化厅

循化系古羌地,秦为塞外地,汉为金城郡河关县地。其南为金城郡白石县塞外地,后汉金城郡废,河关改属陇西;白石县废,晋亦为河关县地,又为临津县地,属晋兴郡,后没于刘曜。苻坚灭凉,地属秦。其后为西秦所有,后凉吕光取之。龙飞二年,天水公延以枹罕之众攻临洮、武始、河关,皆克之。

光置浇河郡,旋为南凉秃发乌孤所取。中间入于吐谷浑,西秦乞伏炽磐复取之。慕末东迁,地复入吐谷浑。后周逐吐谷浑,置洮河县为河津县;唐废河津县置米州及米川县。州旋废,属河州。永徽六年,移县于河北,改属廓州。宋为积石军,又为循化城地,又为安疆砦地,又为怀羌城地。

金升积石军为州,怀羌为县,元因之,州隶吐番等处宣慰司都元帅府。明废州改所,其地为河州边外地,立保安、起台二堡。清初因之。雍正四年,青海都统达鼐、西宁总兵官周开捷安插降番,清查田地,始定额数,归河州同知。八年,立循化营。乾隆二十七年,移河州同知于循化营,仍隶兰州府。道光三年,改属西宁府。

新设丹噶尔厅

旧属西宁县地。乾隆九年,西宁道杨应据以路通西藏,逼近青海,为汉、土、回、番暨蒙古准噶尔往来交易之所,因关要隘,设县佐一员。旋经甘肃巡抚黄廷桂转奏,以高台县主簿移驻之。道光九年,陕甘总督杨遇春题准改设同知。儒学未设,士子仍隶西宁县应试。

疆域附形势

西宁县 碾伯县 大通县 贵德厅 巴燕戎格厅以上均详前志

新隶循化厅道光三年,改隶西宁府。

治在府东南二百七十里。东至积石关河南河州界,迤北碾伯县界,相距六十里。西至清水河贵德厅界,一百九十里。南至下则盖寨洮州厅界,三百五十里。北至黄河不一里,过河小积石山巴燕戎格厅界。东南至老鸦关、河州界,一百二十里。东北至马营集、河州、碾伯县界,一百四十里。

西南至贺尔寨蒙古界，三百二十里。西北过河至甘都堂堡巴燕戎格厅界，三十里。层关为门，屏似削峰，塞番外薄，黄河中通。

新设丹噶尔厅道光九年，改设同知。

治在西宁府城西九十里。东至镇海堡阊门西宁县界，三十五里。西至巴彦托亥庄青海界，二十五里。南至日月山青海界，八十里。北至申中前后沟青海界，二十里。东南至曲布他沟，西宁县界，二十里。西南至塔尔湾青海界，二十五里。西北至下胡丹度庄青海界，二十里。东北至西纳川、拉沙尔、喇课营汛，西宁县界，三十里。水抱东南，山环西北，地接青海，路通三藏。

山 川

西宁县 贵德厅均详前志

碾伯县

石佛山 在县东北六十五里解脱寺后，以形似名。相传石佛甚灵，仓加各族熟番及黄河南生番拜祷者络绎不绝。

药水泉 在县南一百七十里古鄯慈利寺西。自山崖石孔流出，潺湲不竭，沸腾有声。其味辛温，饮之愈胃疾。每岁六月六日，远近居民，多趋饮之。原有药王庙，遭乱焚毁，

今重建焉。

娘娘池 在古鄯西十里黄草山腰。池长三十余丈，阔四丈余，深不可测。遇旱，远如狄、河之民，亦来祈祷。旧有三霄殿，遭乱被焚。

大殿泉 在古鄯下李家山腰，形如殿庭。其水淋淋，天欲雨，常出云雾，高过山巅。遇旱祷之，辄应。

九池岭 在古鄯南，土人呼为尖岭。上多松杉、野花，秀丽可爱；下有泉九眼，故名。

瞿昙池 在瞿昙寺永乐殿内，相传西域喇嘛由海心山率徒至斯池饮马，遗其鞭。番僧三刺建刹焉。

凤凰泉 在县东北六十里张家寺。

大通县

八宝山 在县东北百五十里，与雪山相连，物产甚饶，松柏有数千载者。西北入青海生番地，水东流入甘肃界。

永寿山 在县南里许，又名龙山，为县城前屏。

照壁山 在县城南。

西峰山 在永安城西南，有泉号西河台。

大墩山 在县城东南，上建文峰塔。

东山 在县东南二里，上建奎星阁。

西山 在县西里许，万峰环抱，为县城后屏。

毛牛山 在县东三十五里，元朔山之旁支也，以形似名。以上补前志所阙

巴燕戎格厅

拉扎山 在城东十五里。

卡错山 在城南二十里,系赴甘都〔堂〕堡小径。由拉扎山至甘都六十里,由卡错至甘都四十里。

帽儿山 在城西北三十里。

玛燕山 在城西北三十里,有二池:一名娘娘池;一名龙王池。

楼子山 在城北端庄脑三十里。

青砂山 在城东北三十五里。

骨儿尕山 在城东三十五里。

尕洞山 在城东八十里。

奔坑山 在城东一百二十里。山有石,如棋盘然。

尕加山 在城南十里,邑人呼为东山。

阿米吉利山 在城西北七十里,产银砂并绿色石,其质如玉,略软。

除玛 在城东四十里。下临河滩,产金砂。

尕吾山 在城西南二十里。

曲加山 在城西南八十里。

泉集山 在城西南一百二十里,林木丛杂。

拉水硖(按:“拉水”当作“拉木”,以形近而讹) 在城东南二十五里,产红铜。

合儿群硖 在城东南十里。

多隆硖 在城南五里。

阿湾硖 在城西南二十里。

甘都川 在城东南六十里。

水地川 在城西南七十里。

官巴滩川 在城北十里。

四塘川 在城西北四十里。

札巴川 在城西北六十里。

曲加滩川 在城西南八十里。

群加川 在城西北百四十里。

新隶循化厅

小积石山 在城北百余步黄河北岸。嶙峋峭拔,全山皆石。迤邐东去,河水至积石关始出硖。

阿木你达拉加山 在城东北六十里孟达工东,即积石关山脉也。

南屏山 在城南百余步。

白石山 在城东南二百数十里。宋时谓露骨山,今俗名太子山。山巅积雪,冬夏不消,故又曰雪山。石骨杰出,高入云表,数百里外能望见之。由东而西而北,直抵积石关。明设二十四关,皆在此山崖谷之间。

石门山 在城东南一百九十里,即土门关也。两山中断,漓水自口外经厅境流入关,为河州界。

打儿架山 在城东南九十里。

料东山 在城南二百五十里火力藏寨。山多大木。

观音山 在城南二百里。

阿米脱绽山 在城南三百三十里下则盖寨。

塞木力山 在城南三百三十里哈家寨。山多大木。

泥什山 在城南三百三十里哈家寨。山多大木。

宗务山 在城西八十里下龙布寨。林木茂盛，居民薪材，多取给焉。

撒弄山 在城西八十里旦〔占〕郡庄。山多大木。

元固山 在城西六十里查汉大寺工。山多大木。

大石山 在城西南一百五十里和洛那寨扎什其寺。

烟墩山 在城西南一百二十里保安堡东。

莲花山 在城西南一百三十里保安堡。

双朋山 在城西南一百六十里阿巴喇寨。

迨赫弄山 在城西南一百六十里加卧寨。

多力山 在城西南一百六十里加卧寨卡错寺。

角木山 在城西南一百七十里错勿日寨。

速古山 在城西南一百八十里沙卜浪寨。山多大木，上有叶冲寺。

达任山 在城西南一百八十里多巴寨。山多大木，上有达任寺。

旦布山 在城西南一百八十里多巴寨。

捏贡川 在城南二百里，即甘家川。

名合赞寨川 在城南三百五十里。

下则盖川 在城南三百五十里。

黑错寺川 在城南二百八十里。

阿〔拉〕卜楞寺川 在城南二百里。

黄河 自贵德厅境西流入宗务硤，保安河南来注之。迳（按《水经注》：“径”均作“迳”因改从）查家工北，边都沟水南来注之。自宗务硤至积石关凡一百四十里。河水东过陇西河关县北。《水经》及《汉书·地理志》曰：汉宣帝神爵二年置河关县，盖取河之关寨也。河水又东北流入西平郡界，左合二川，南流入河。又东北济川水注之。又东迳浇河故城北，有二城，东西犄角。东北去西平二百二十里。又东北迳黄川城，又东迳石城南，左合北谷水。又东北迳贵德城南，西北去西平二百一十七里。又东北迳广威城北，右合乌头川水。又东迳邗川城南。又东临津溪水注之。又东迳临津城北白土城南。《十三州志》曰：左南津西六十里有白土城，城在大河之北，而为沿河济渡之处。又东，左会白土川水。又东北会两川，右合二水，参差夹崖连壤，负险相望。河北有层山。

保安河 亦曰野雀河。源出于厅属合儿番寨之素古山。北流迳野雀硤，东出保安堡东南境，西北流一百五十里入黄河。清水河源出贵德属之素古山，经火纳坪塘西至古隆庄西南，入保安大河，俗称之为昂拉河。恩沾木河，源出厅属之加卧番寨加撒山，经恩沾木庄入保安大河。哈麻沟河，源出厅属之铁布番寨什达隆山，经保安城西入大河。

漓水 即大夏河。源出达那河，自厅属西南之蒙古界

流入。迳拉卜楞寺一百五十里至上南拉寨。

咱又河 源出咱又塞硤中，自西南下。

哈家河 源出洮州之哈家寨。自东南来，合流注之，遂名噶河。至桥沟寺曰桥沟河。

且隆河 源出打儿架山沟中，北来注之。出土门关入河州境。自上南拉寨至土门关，凡一百二十里。

漓水 在厅境，凡二百七十里。漓水有支流名白石河者，源出西南边外打城达巴罕山。

郭茂泉 在城南五十里纯义沟。

温泉 在城西南一百八十里旦布山。附近居民有疾，或就泉浴，或饮其水，辄愈。

郭隆泉 在城南五十五里。

恰布欠泉 在城南五十里。

撒茂泉 在城南五十里。

沙东隆哇泉 在城东七十里。

宁巴沟乱泉 在城东七十里起台沟。

夕厂沟乱泉 在城东九十里。

托巴泉 在城西四里。树木茂密，多栖鹭鸶、水鸭，有似鸥而颈长者，惯啄生鱼为食，俗名之为钓鱼郎。

药水泉 在城南一百里捏刚洞侧。

札木泉 在城东三十里张哈工札木庄。

五山池，在城东南一百二十里打儿架山山顶。六月积

冰,遇旱祷之。

新设丹噶尔厅

北极山 在城东北里许。七峰排峙,状如列星。山间朝暮常有五色云气,庙宇辉煌,相为掩映。

松蛾山 在城东南三里。一峰突起,上挺孤松,五色金蛾,飞舞松间,望之栩栩欲仙,令人起遐逸之思。

南屏山 在城南四十里。群峰耸峙,峭壁之中,有经岁不消之积雪。雨过月明,自远望之,如玉屏焉。

人峰山 在城西二十五里。岭有奇石,岸然独立,如伟丈夫,故名。

瀑布山 在城西二十五里阳坡沟。山腰有泉,悬流而下,势如瀑布。又绿树荫浓,映带上下,风雨之际,泉声树声,幽然可听,大可清俗虑而起道心,故俗名曰神树湾。

隔板山 在城西二十五里。叠嶂嵯峨,高出云表,万树排列,如隔如架,故名。

照壁山 在城西三十里。奇石错综,乱卧如狮,山峰即壁立而突兀,夕照生万丈之光辉,故名。

星泉山 在城西十余里。山麓有小泉无数,夜间波光摇动,状如列星,故名。

塔藏山 在城南三十里。山势高峻,顶有路如线,直达青海。

河拉山 在城北五里。高数千仞,上有泉。

达板山 在城西南五十里。山峰峻峭，登临绝顶，云雾自足下起。俯瞰青海，仰摩碧霄，为一邑之巨观焉。

凤凰山 在城南十里。

药水泉 在城南三十里。绀洁清凉，严寒不冰。

阳坡泉 在城正北三里。水温味甘，饮之能治胃疾。

阴坡泉 在城东南五里。泉自半山流出，虽炎暑，常凝为冰。

生云泉 在城北五里。居民遇旱，祷之。

热水泉 在城西百里。饮之能治腿疾。

神泉 在城西南三十余步。遇旱祷之。

曹家泉 在城南十里。

响河 在城东十五里。入西石碛，水声如雷，山鸣谷应。夹岸绿柳森森，碧烟缭绕。

白水河 在城南三十里。山麓有小泉无数，河（按：当作汇）流成河。其色白，流十余里，会药水河。

倒淌河 在城西南九十余里察汉城脑。日月山麓水自东倒流，入于西海，故名。

药水河 在城南三十里。流不及里，会东科河。下流三十里至城南，入达藏河。

达藏河 在城南，源出扎藏寺脑。引溉民田，其利甚溥。

普哈河 在城西二百余里。自西北来，流入青海。

东科河 在城南五十里。自东科寺脑流入达藏河,水势甚猛。

水利

西宁县 碾伯县 大通县 贵德厅以上均详前志

巴燕戎格厅

甘都堡河东渠 引青砂山水,灌地九百三十四段。下籽仓斗粮二百一十五石四斗三升六合。

河西渠 引克欠山水,灌地六百二十四段,下籽仓斗粮一百四十三石六斗二升四合。

上水地川渠 引科才山水,灌亦沙尔、安达池哈二庄地四百一十四段,下籽仓斗粮八十六石六斗七升六合。

文卜吾具庄、舍仁庄渠 引尕昂山水,灌地二百七十五段,下籽仓斗粮五十七石七斗八升四合。

下多巴庄渠 引扎巴山水,灌地二百六十五段,下籽仓斗粮四十九石二斗三升。

上多巴庄渠 引查铺山水,灌地二百七十一段,下籽仓斗粮五十石三斗三升。

青库尔、藏加、毛斯等三庄渠 引曲加山水,灌地一百五十四段,下籽仓斗粮四十四石九斗一升。

上十族迭咱庄渠 引群加山水,灌地一百二十四段,

下籽二十六石四斗。以上补载前志所阙

新隶循化厅

起台堡渠、四宁巴渠、三寨水渠、磨渠、迭思慢渠，自哈家寺山脑起，至白庄塘止，共灌地二千九百三十一段，余水流入清水工。

夕厂沟渠 自沟脑起至崖慢工，由崖慢工至清水工止，灌地二千五百六十六段。

边都寨渠、十三多娃庄渠、腊木车渠，皆引边都沟水。

纯义渠、三存腊卡渠、腊木车渠、腊黑顺渠，皆引顺义沟水。

泥夕渠、日茂渠、张家渠、牙顺渠、熊娃渠、西黑庄渠、腊宁哇渠，皆引中库沟水。按三沟之水，灌边都七庄地一千五百五十五段，合查家工，统名边都沟。

查家工渠 引边都沟水，灌地七百四十三段。

街子工渠 凡分数股。东岸马家寨尕浪渠、巴杂渠、官渠、别烈渠，西岸说力渠、掌教坊渠，皆引边都沟水。附庄托把，在尕浪渠引水；瓦匠庄，在官沟头引水；草滩坝，在官沟磨河滩引水，灌地六百三十一段。

街子工巴西沟庄渠 在西沟脑引水，昼灌街子工地五百一十六段；夜灌草滩坝、瓦匠庄等处之地。曾经兴讼，厅断有案，迄今遵之。

张哈工渠 引起台沟水，灌地八百五十八段。

孟达公(按:当作“工”)渠 引起台沟水,灌地一千二百有八段。

苏只工渠 引尕楞沟水,灌地一千一百段。

查家工渠 引边都沟水,灌地一千七百九十段。

查汉大寺工渠 引卑塘沟水,灌地一千二百八十段。

下龙布、宗布(按:“宗布”九页作宗务)、占郡渠 引下龙布沟水,灌地二十二段。

卑堂沟寨渠 引卑堂水,灌地三十五段。

哈楞寨渠 引红土坡水,灌地九十七段。

曲桑寨渠 引古帽卡水,灌地五十五段。

郎家寨渠 引双棚沟水,灌地九百七十八段。

素胡寨渠 引加务山脑水,灌地七十七段。

札木寨渠 引加务山脑水,灌地三十九段。

铁布寨渠 引加务山脑水,灌地五十七段。

火力加寨渠 引保安河水,灌地九十段。

错勿日寨渠 引保安河水,灌地一百二十段。

塞黑吉寨渠 引保安河水,灌地八十四段。

姜什加渠 引野雀碛水,灌地四十八段。

古儿迭渠 引野雀碛水,灌地三百有一段。

曲麻渠 引沙布浪沟水,灌地二百七十二段。

恩沾木渠 引双棚沟水,灌地八百五十三段。

多巴渠 引野雀碛水,灌地一百三十七段。

双棚渠 引本沟水，灌地九十一段。

火力藏渠 引甘家川水，灌地一百六十二段。

下哈家渠 引本沟水，灌地一百三十三段。

吴屯渠 引保安河水，灌地四百九十八段。

季屯渠 引保安河水，灌地五百六十段。

李屯渠 引保安河水，灌地五百四十段。

脱屯渠 引保安河水，灌地四百八十五段。

新设丹噶尔厅

那龙大庄渠 在城西南七里。自庄南至群科河，长八里。

他(按：“他”当作“池”)汉渠 在城西南四里，引群科河水。

新泉渠 在城西十四里。引群科河水。

立大渠 在城西四里。引群科河水。

西中沙渠 在城西二里。引群科河水。

东中沙渠 在城东南里许。引群科河水。

察汉素渠 在城南十里。引药水河水至其庄，长二十里。

以上七渠，共灌地一千七百七十九段，下籽一千三百七十一石二斗三升。